



STINAPA TA INFORMA

ENFERMERA KONSIENTE

Ta ken no sa mira e enfermera aki ta kana kasi tur atardi? Nada straño, ya ku kanamentu ta un di su hòbinan, ademas di lesa. Ariola Miranda-Marchena, 2 yu, a traha mayor parti di su bida komo enfermera sikiátriko. Aktualmente e ta laborando na Dienst Gezondheid en Hygiëne (DGH). Tin varios aspekto di nos naturalesa ku ta hasi Ariola orguyoso di Boneiru: nos airu puru i limpi i nos laman bunita. Tambe e echo ku ta NOS mes ta mantené nos isla limpi. "Nos mester ta orguyoso di lokual nos tin", Ariola ta aksentuá. "Hato, mi propio bario!" Ta su promé kontesta ora puntr'é ta ki ta su lugá faborito. Dor di e serkania di laman, e echo ku tin hopi mata i palu haltu i e trankilidat. Ademas di Hato, Ariola ta sinti su mes bon na tur laman na Boneiru. "Kada unu tin su bunitesa." E ta gosa kon transparente e laman di Boneiru ta. Segun Ariola nos ekonomia ta dependé den masha sentido di nos naturalesa. Lamannan ku ta protehá ta trese piskánan saludabel pa propio konsumo òf pa bende. Sin polushon nos mes por kria nos berdura i frutanan pa propio konsumo òf benta. Mientras ku e turista ta bini Boneiru pa gosa di nos naturalesa bon konservá. Ademas, si bo no tene naturalesa limpi bo ta haña bo fásilmente ku enfermedatnan. Lokual ta afektá tantu nos bienestar komo ekonomia (hendenan ku ta malu i no por traha). Ariola ta konsiente ku su bienestar ekonómiko ta dependé di naturalesa. Mas entrada ekonomia tin dor di turismo, mas mihó e por biba di su salario dor ku ekonomia ta drecha i hasta preisnan por baha. Mientras ku e entrada ku gobièrnu ta haña dor di turismo, ta yuda paga su salario. Su mensahe ta masha kla: "Pa nos kuida e naturalesa, no solamente pa turista sino pa nos mes tambe". E ta pidi pa no tira sushi unda ku ta. Gobièrnu mester duna mas informashon òf bini ku kampañanan manera STINAPA. Sigur mester bini ku mas regla di protekshon. Ariola ta kere tambe ku mester papia ku nos hendenan lokal pa pidi conseho kon pa protehá nos naturalesa. Pesei e ta gosa ku STINAPA a tuma e iniciativa pa bai Sint Lucia pa wak kon e piskadónan a yuda protehá nan piskánan. Asina nos tambe na Boneiru por siña.

Skirbí pa Natalie Wanga, tradusí pa Marcel Nahr.

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALESA



Traha huntu na un desaroyo duradero pa Boneiru